

Fundargerð 69. fundar

stjórnar Samtaka orkusveitarfélaga

Árið 2024, föstudaginn 23. febrúar kl. 09:00 kom stjórn Samtaka orkusveitarfélaga saman til fundar og fór hann fram í gegnum fjarfundarbúnað.

Fundinn sátu: Ása Valdís Árnadóttir, Árni Eiríksson, Guðný Birna Guðmundsdóttir, Jónína Brynjólfssdóttir, Knútur Emil Jónasson, Einar Kristján Jónsson og Grétar Ingi Erlendsson.

Að auki sátu fundinn Hilmar Gunnlaugsson, lögmaður, formaður starfshóps um skattlagningu orkuvinnslu, Haraldur Þór Jónsson, sveitarstjóri Skeiða- og Gnúpverjahrepps, Þórdís Sveinsdóttir sviðsstjóri þróunarsviðs sambandsins, Helga María Pálsdóttir sviðsstjóri stjórnsýslusviðs sambandsins og Jóhannes Ágúst Jóhannesson sem ritaði fundargerð.

Fundargerðin var færð í tölvu.

Þetta var tekið fyrir:

1. Skattlagning orkuvinnslu - 2402001SO

Samtök orkusveitarfélaga unnu stefnumótunarvinnu í ársbyrjun 2023 og skipuðu í framhaldi starfsnefnd til að vinna að breytingartillögum varðandi tekjur sveitarfélaga af orkuframleiðslu, leggja fram tillögur varðandi breytt lagaumhverfi um orkuvinnslu og skilgreiningu nærumhverfis með virku samtali allra hagaðila.

Starfnefnd vann mikið og gott verk með fundum og vinnustofum, m.a með ráðherrum og hagaðilum, sem hún skilaði af sér á aukaaðalfundi Samtaka orkusveitarfélaga þann 19. september 2023.

Síðasta sumar var einnig skipaður starfshópur á vegum fjármála- og efnahagsráðherra sem fékk það verkefni að skoða skattalegt umhverfi orkuvinnslu í stærra samhengi. Markmið hópsins var að skapa nýja skattalega umgjörð og leiðir til að tryggja að ávinningur vegna nýtingar auðlinda og orkuvinnslu skili sér í ríkari mæli til nærsamfélaga og þeirra aðila sem fyrir áhrifum verða. Starfshópurinn hefur nú skilað af sér skýrslu en í skýrslunni er m.a. tíðrætt um tillögur Samtaka orkusveitarfélaga.

Formaður starfshópsins Hilmar Gunnlaugsson kom inn á fund stjórnar Samtaka orkusveitarfélaga og kynnti niðurstöður skýrslunnar.

Stjórn gerir eftirfarandi bókun:

Stjórn vill byrja á því að þakka starfsnefnd samtakanna kærlega fyrir þeirra vinnuframlag sem voru metnaðarfullar og faglega unnar tillögur. Ánægjulegt er

að sjá hversu mikið var horft til þeirra í skýrslu starfshóps ráðherra. Jafnframt vill stjórn þakka aðildarsveitarfélögum fyrir þeirra þátttöku á vinnustofum og öðrum fundum sem haldnir voru á tímabilinu.

Þrátt fyrir að litið hafi verið til tillagna samtakanna um afnám undanþágu skatta á orkumannvirkjum þá lítur stjórn svo á að hún þurfi að vinna áfram og nánar að öðrum tveimur lykilþáttum í stefnumörkun samtakanna, annars vegar um að afnema dreifbýlisgjald og jafna þar með raforkuverð og hins vegar því að skoða skattlagningu flutningskerfisins.

Stjórn þakkar Hilmari Gunnlaugssyni formanni starfshóps um skattlagningu orkuvinnslu fyrir góða kynningu.

Stjórn Samtaka orkusveitarfélaga tekur jákvætt í þróun mála og fagnar því að fram séu komnar tillögur um breytingar á skattlagningu orkuvinnslu og vonar að með því sé kominn skriður í málið. Áður hafa verið skipaðir tveir aðrir starfshópar um þetta mál en hvorugur þeirra komst að niðurstöðu.

Stjórn Samtaka orkusveitarfélaga vill lýsa mikilli ánægju yfir þeirri vinnu sem unnin hefur verið og líst nokkuð vel á framkomnar tillögur.

Stjórnin er þó ekki sannfærð um ágæti þeirrar tillögu að blanda Jöfnunarsjóði inn í vinnuna en þar sem enn er þó nokkrum spurningum ósvarað í tengslum við tillögurnar þá lítur stjórnin svo á að þetta sé verkefni í vinnslu og tími muni gefast til nánara samtals.

Stjórn Samtaka orkusveitarfélaga hlakkar til að sjá tillögur um endanlegar útfærslur.

Stjórn Samtaka orkusveitarfélaga hvetur Stjórn Sambands íslenskra sveitarfélaga til að óska eftir kynningu og felur formanni stjórnar að óska eftir fundi með stjórn Sambandsins um málið.

Fundi var slitið kl. 10:50